

Regional News Unit AIR Aizawl
Thursday, October 10, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- AH & Vety Minister Pu C. Lalsawivunga'n vawk pul hri, African Swine Fever chu Mizoram in a tawrh nasat em avangin, State Disaster-ah puang tura hmalak mek a ni a ti.
- Aizawl Municipal Corporation chuan hman khat daih sarang tihrem tuma hma an lakna kal zelah tun hnai khan Aizawla dawr hrang hrang ah sarang kg 55 chuang an man.
- Union Cabinet chuan National Maritime Heritage Complex(NMHC) Gujarat-a Lothal ami chu tih changtlun a rel
- Prime Minister Narendra Modia chuan ni hnih thangin vawiin hian Laos-a Vientiane khawpui a pan dawn.

<><><>

AH&VETY

Animal Husbandry & Veterinary Minister Pu C. Lalsawivunga'n vawk pul hri, African Swine Fever chu Mizoram in a tawrh nasat em avangin, State Disaster-ah puang tura hmalak mek a ni a ti.

He thu hi nimina Aizawl Vety Polyclinic Hospital Conference Hall-a vawk hriin a man suattute zangnadawmna pek tur puala hun hmannaah Minister chuan sawiin, Zangnadawmna pekchhuah hi kum 2022 chhunga vawk suat sak chhungkaw 1847 te chan tur niin cheng Nuai 263 sing 3 sang 2 release a ni a, tun tuma pekchhuah hi zaa 25 niin a bak zaa 75 pawh hmuh leh thuai beisei a nih thu sorkar thuchhuah chuan a tarlang. Zangnadawmna hi District tina thuneitute'n an District theuhah an sem chhuak dawn a ni.

He hunah hian thusawiin Pu C Lalsawivunga chuan ASF hri chu ven leh tihdam a nih theih nan sorkar laipui-ah a damdawi leh hri danna vaccine siam emaw ram dang atanga lak luh dan tur ngaihtuah turin department chuan Sorkar laipui-ah a thlen thu a sawi a. Kum 2024 chhung October Ni 7 thlengin Vawk thi 13809 awm tawhin 23010 suat tawh a ni tih sawi bawkin Vawk suat Compensation hi Kum 2025-2026 chhung Assistance to State for Control of Animal Diseases (ASCAD) Action Plan-ah telhin sorkar laipui-ah dil leh tur a ni a ti.

Compensation kalphung chu state leh central sawrkar intum sem anih avangin Mizoram sum tam tak a kal ral tih Minister chuan sawiin sawrkar laipuiin zaa 90 leh state in zaa 10 tum ve turin dilna pawh thehluk tawh a ni a ti bawk.



EK PED MAA KE NAAM

Sorkar laipui Ek Ped Maa Ke Naam campaign hnuaiah Mizoramah thing nuai 5 chuang phun a ni tawh a.

Aizawl Divisional Forest Officer, Campaign Nodal Officer ni bawk Pi Vanlalnunpuii Hmar chuan Prime Minister Narendra Modi ngenna angin kumin June ni 5 atang khan Mizoram sorkar chuan thingphun beihpui a thlak a, vawiin thlengin he campaign hnuaiah hian thingphun belh a ni reng a, Mizoram leilung mil vek phun a ni bawk a ni, a ti.

(BYTE)

Mizoram hi ramchhunga ramngaw ngah ber a ni a, a ram chhung zaa 84.53 chu ramngaw in a la khuh a ni.

He Campaign ah hian sorkar dept bakah school, college, University, NGO, Village Council leh Local Council te bakah mimal thahnawmngai engemawzatin thing an phun a, thingphun duh hi an awm anih phawt chuan Forest Office hrang hrangah te thing tiak lak tur a awm thu Pi Vanlalnunpuii Hmar chuan a sawi a ni.



AMC

Aizawl Municipal Corporation chuan hman khat daih sarang tihrem tuma hma an lakna kal zelah tun hnai khan Aizawla dawr hrang hrang atangin hman khat daih sarang kg 55 chuang an man.

Aizawl Municipal Corporation chuan September ni 24 atanga ni 27 inkarah beihpui thlakin hmun hrang hrangah dan zawm lote an enfia a, plastic carry bag kg 49 manin plate, spoon leh fork chi hrang hrang kg 3 manin wrapping gram 500 an man bakah No kg 2 an man bawk a ni.

August thla chhung khan Aizawl Municipal Corporation hmalakna-a hman khat daih plastic dapchhuah hna thawh naah hman khat daih plastic tam tham tak man a ni tawh a, dapchhuah hna hi Bazarpuui leh a chhehvel, Bethlehem Veng, Bethlehem Vengthlang, Tuithiang Veng, Zonuam, Luangmual, Durtlang Leitan leh Durtlangah te neih niin Dawrkai 26 hnen atangin dan in zawrh leh hman a khap polythene, sarang, disposable cup, present tuamna, plastic hmanga siam fian leh fork man a ni a, dan angin pawisa chawi tura hriattir nghal an ni bawk a ni.

Aizawl Municipal Corporation chuan Hmankhat daih sarang (Single Use Plastic) chu ram leilung tana tha lo, tu leh fate tan thlenga nghawng thalo thlen thei tur a nih avangin mitinte hmanglo turin an ngen tih an sawi baw.



MIZORAM TEACHERS FEDERATION

Mizoram Teachers' Federation (MTF) hruaitute chuan School Education Department changtu Minister Dr. Vanlalhlana chu kawmin MTF-te'n sawrkara an thu thlen duh hrang hrangte Minister hnenah hian an thlen a, inpawh tlang takin an thu thlente hi an sawi ho a ni.

He inkawm hona hunah hian Mizoram School Education Service chungchangte, school inspecting post ruak hnawh khah chungchangte, Hindi teacher post ruak hnawh khah chungchangte, school provincialization chungchangte, teacher transfer chungchangte leh tul pawimawh dangte sawi ho a ni a. MTF thu thlente hi Minister hian tha taka lo dawngsawngin, a theih anga a lo bawhzui tur thu leh a tul phawt chuan inkawm hona neih leh zel a duh thu a hrilh a ni.

MTF hruaitutte hian rilru inhawng taka Minister-in a lo dawnsawn avang leh hun tha tak a lo pek avangin lawm thu an sawi a. Mizoram zirna atana Minister hmalaknate theihtawp chhuahpui zel an tum thu an sawi baw a ni.

Mizoram Teachers' Federation hi School Education Department hnuai association hrang hrang khai khawmtu ber a ni a. He hunah hian elementary atanga secondary school zirlaite leh zirtirtute harsatna hrang hrang leh a sut kian theih dan turte pawh ngaihtuah ho a ni.



CHILD PROTECTION

National Commission for Protection of Child Rights (NCPCR) leh Mizoram State Commission for Protection of Child Rights (MSCPCR) buatsaih naupang enkawlina hmun hrang hranga awm ten rilru hrisel leh an Counseling mamawh ang an neih theih dan tur zirhona nimin khan Aizawlah an buatsaih a

He hun hi MLA Pi Baryl Vanneihsangi'n a telpui a, thusawiin mi tin in naupangte dikna chanvo an hriat a pawimawh a, naupang ten enkawlina tha an dawn vek theih nan hmalak a ngai a, naupang than lenna kawngah thawktute an pawimawh hle a ti.

Pi Baryl-i chuân Mizoram ah Naupang humsual dai leh nu leh pa enkawltu mumal neilo enkawlina hmun CCI 60 a awm tih sawiin heng a awm te hi a bikin ngaihtuah an ngaih thu a sawi a, an mahni enkawl turin chhungril a harsatna an tawh te hriatthiam pui a ngaih thu a sawi baw.

MSCPCR Chairperson Pu Jimmy Laltdanmawia chuan Naupang te chu hma hun tha tak an neih theih nana tha taka enkawl ngai an ni a ti a. Naupang hum sual dai leh harsatna tawh te tan Commission for Child Rights in hma nasa takin a la tih sawiin, naupang ten an hma hun ah an nih phung an phak theihna turin hemi lama thawh tu ten mawhphurhna sang leh Hlu tak an chelh thu a sawi baw.



MARITIME HERITAGE COMPLEX

Union Cabinet chuan National Maritime Heritage Complex(NMHC) Gujarat-a Lothal ami chu tih changtlun a rel. Union Information and Broadcasting Minister Ashwini Vaishnaw chuan hemi chungchang hi thuthar lakhawmtute hmaah sawiin he ruahmanna hian tuipui lama India hausakna leh rohlu a pho chhuak dawn a ni a ti a. Khawvela maritime complex lian ber a ni dawn a ti a. Prime Minster Narendra Modia hmahlir zulzuiin kum 4500 chuanga upa ramchhunga thil hlu ti changtlung a khawvel huap pawh a tha ber pawl ni tur hi siam hna Union Ministry of Ports, Shipping and Waterway chuan a thawk dawn a ni a ti.

Hei bakah hian ramria hmasawinna ruhrel tihchangtlun chungchang pawh ngaihtuah anih thu sawiin Pu Vaishnaw chuan Prime Minister Narendra Modia'n ramri a ngaipawimawh hle a ti a. Rajasthan leh Punjab ah te ramri tihchangtlun nan kawngpui km 280 siam turin sawrkarin thutlukna a siam a ti a. He project atan hian cheng vaibelchhe 400 ruahman a ni a ti a. Ramri chhehvela khawsa te tan inkalpawhna tha leh khawsakphung nuam zawk a pe thei dawn a ni a ti.



PM IN LAOS

Prime Minister Narendra Modia chuan ni hnih thangin vawiin hian Laos-a Vientiane khawpui a pan dawn a. Union Ministry of External Affairs-a Secretary East Jaideep Mazumdar chuan vawiin khan PM Modia zin tur chungchangah hian chanchinbumite kawmin Pu Modia hian ASEAN-India Summit vawi 21 na leh East Asia Summit vawi 19-na a hmang dawn a ni a ti a. Pu Mazumdar-a sawidanin tun tum hi ASEAN –India Summit a tel vawi 10-na tur a ni a. Laos Prime Minister Sonexay Siphandone sawmna angin Prime Minister Modia hi a zin dawn tih sawiin a cham chhung hian India leh ASEAN inkara thil pawimawh hrang hrangte ram hruaitu dangte nen an ngaihtuahho dawn a ni.



RATAN TATA

Ramchhunga Industry lama mi hmingthang leh mi inphal Ratan Tata chu nizan khan kum 86 mi niin Mumbai ah a thi. Pu Tata hi hun engemawchen private damdawiinah enkawl a nih hnuah a thi a. Maharastra sawrkar chuan Ratan Tata hi sawrkar chawimawina famkim nen vui liam anih tur thu a puang a ni.

President Droupadi Murmu, Vice President Jagdeep Dhankar leh Prime Minister Narendra Modia te chuan Ratan Tata an ui thu an thawn nghal a. Social Media-a a thudahah President Murmu-i chuan India in a mi hlu tak a chan tih sawiin ram hmasawinna leh hnathawhnaa rinawmna chawilar tu a chan a ni a ti.

